

АДАМДЫҚ ДИҚАНШЫСЫ.

Адамдық диқаншысы қырға шықтым
Көлі жоқ, көгалы жоқ қырға шықтым
Тұқымын адамдықтың шаштым, ектім
Көңілін көгертуге құл халықтың.
Қор болған босқа кетіб еңбек, бейнет,
Құлдарға құлдықтан жоқ артық зейнет.
Оттай бер! Жануарым, екі аяқты;
Адамдық хайуанға қанша хажет!
Жаратқан малды Хұдай не керекке?
Мінуге, сойу, соғу, жүндемекке?
Жорта бер қамыт киіб, қамшыңды жеб,
Бұйрық жоқ ұрасын деб үндемекке.
Тайаққа еті үйренген қойшы жайлаб
Көк есек қозғала ма? Түрткенге айдаб.
Есебден алданғандай болғандар көб
Жасықды асыл ма деб білмей қайраб.
Маса, 74 б <http://baitursynuly.kz/books/7069.pdf>